

Na osnovu člana 18. Zakona o udruženjima i fondacijama (Službene novine Federacije BiH br.45/02), te člana 29. Statuta, Skupština Udruženja Šahovskog saveza Kantona Sarajevo, na sjednici održanoj u Sarajevu dana 16.07.2022. godine, donosi:

STATUT

Šahovskog saveza Kantona Sarajevo

Opće odredbe

Član 1.

Šahovski savez Kantona Sarajevo (u daljem tekstu: Savez) je strukovni sportski savez slobodno i dobrovoljno udruženih udruženja šahovskih klubova na području kantona Sarajevo, koji djeluje u skladu sa odredbama Zakona o udruženjima i fondacijama FBiH, Zakona o sportu BiH, Zakona o sportu Kantona Sarajevo i odredbama ovog Statuta.

Član 2.

Statut udruženja sadrži:

- 1) naziv i sjedište udruženja;
- 2) ciljeve i djelatnost udruženja;
- 3) zastupanje i predstavljanje udruženja;
- 4) organe udruženja, njihove ovlasti, način imenovanja i opoziva, trajanje mandata, kvorum i pravila glasanja, uključujući i pitanja o kojima se odlučuje kvalificiranom većinom, funkciju lica ovlaštenog da saziva skupštinu;
- 5) oblik i sadržaj pečata udruženja;
- 6) oblik i sadržaj znaka ako udruženje odluči da ima znak;
- 7) sticanje i raspolaganje imovinom;
- 8) način donošenja finansijskog izvještaja i izvještaja o radu;
- 9) postupak za donošenje statuta, izmjena i dopuna statuta i drugih općih akata udruženja;
- 10) uvjete i način učlanjenja, prestanak članstva, kao i prava, dužnosti i odgovornost članova udruženja;
- 11) uvjete i postupak za pripajanje, razdvajanje, transformaciju ili prestanak rada udruženja;
- 12) pravila za raspodjelu preostale imovine u slučaju prestanka rada udruženja.

Statutom se mogu urediti i druga pitanja od značaja za ciljeve i djelatnost udruženja.

Naziv i sjedište udruženja

Član 3.

Naziv Saveza je: Šahovski savez Kantona Sarajevo.

Skraćeni naziv je: ŠS Kantona Sarajevo.

Sjedište Saveza je u Sarajevu, ulica Zagrebačka 4A.

Ciljevi i djelatnost udruženja

Član 4.

Savez djeluje i razvija sportsku djelatnost na teritoriji Kantona Sarajevo.

Savez se može udružiti u Šahovski savez Federacije Bosne i Hercegovine i Sportski savez Kantona Sarajevo.

Član 5.

Savez je nepolitička i izvanstranačka organizacija koja sprečava zloupotrebe šahovskog sporta, sportskih priredbi i manifestacija u političke svrhe.

Član 6.

Ciljevi i djelatnosti su:

Opredjeljenje za sport i odgoj kao sveopću kategoriju i osnovno ljudsko pravo od strane svih (djece, omladine, odraslih i osoba sa invaliditetom) na temelju odredaba Evropske konvencije o ljudskim pravima i temeljnim slobodama, Evropskom poveljom o sportu, Konvencijom UN-a o pravima djeteta, Međunarodnom konvencijom protiv dopinga u sportu, Konvencijom o pravima osoba sa invaliditetom, Konvencijom o pravima osoba sa invaliditetom namijenjenoj djeci, Evropskom konvencijom o nasilju i nedoličnom ponašanju gledalaca na sportskim priredbama, Olimpijskom poveljom, Paraolimpijskom poveljom, Evropskim kodeksom o sportskoj etici, Deklaracijom o sportu, toleranciji, fer-pleju, pravilima međunarodnih sportskih asocijacija, Izjavom iz Lozane o organizovanju sporta u BiH, kao i svim drugim međunarodnim multilateralnim i bilateralnim ugovorima kojima je pristupila BiH u oblasti sporta, kao i na temelju odredaba Zakona o sportu BiH i Zakona o sportu KS;

1. Da su oganizatori i učesnici u sportskim aktivnostima obavezni da razvijaju duh olimpizma, podstiču fer plej, suzbijaju nasilje, doping i sve druge neprihvatljive vidove ponašanja;
2. Da se poštuju osnovni principi zabrane diskriminacije po svim osnovama u pristupu i bavljenju šahom;
3. Podsticanje sistematskog i organizovanog bavljenja šahom u slobodno vrijeme;
4. Podsticanje razvoja i unapređenje šaha na području Kantona Sarajevo;

5. Omasovljenje i unapređenje šaha i šahovske djelatnosti;
6. Postizanje vrhunskih rezultata i dostignuća u šahu;
7. Povezivanje i usmjeravanje rada udruženih šahovskih klubova i organizacija;
8. Razvoj i unapređenje saradnje sa drugim šahovskim organizacijama;
9. Sportska saradnja;
10. Utvrđivanje sistema takmičenja;
11. Obezbjedivanje i zaštita ugleda šahovskih klubova u KS;
12. Utvrđivanje politike i programa razvoja i promicanja šahovskog sporta u skladu sa politikom razvoja sporta u KS, FBiH, a i šire;
13. Saradnja sa odgovarajućim nadležnim institucijama i drugim organizacijama na realizaciji zadataka od zajedničkog interesa;
14. Stvaranje uslova za organizovanje, provođenje i razvoj šaha u KS;
15. Praćenje i usklađivanje kalendara sporstkih takmičenja i drugih manifestacija i događaja na području KS i šire;
16. Zalaganje za obrazovanje i usavršavanje talentovanih sportista, posebnih mlađe kategorije;
17. Zalaganje za obrazovanje i usavršavanje stručnih kadrova;
18. Obezbjedjenje dostupnosti informacija i popularizacija šaha;
19. Organizovanje i provođenje sportskog marketinga, seminara, kurseva, škola šaha i sportskih takmičenja u šahu u KS i šire;
20. Organizira šahovska takmičenja (ekipna i pojedinačna) na području KS;
21. Pomaže klubovima u pripremama kandidata za federalna, državna i međunarodna takmičenja u svrhu reprezentovanja kantona;
22. Vodi evidencije o svim udruženim šahovskim klubovima, organizacijama i registrovanim šahistima;
23. Vodi sve druge evidencije od značaja za kvalitetno i efikasno upravljanje i funkcionisanje Saveza;
24. Zastupa interese udruženih šahovskih klubova i organizacija pred organima kantona i sportskim asocijacijama čiji je član;
25. Uspostavlja i ostvaruje sportsku saradnju i veze sa šahovskim savezima u FBiH i šire;
26. Stara se za postizanje općih materijalnih i drugih uvjeta za rad Saveza;
27. Organizira obavljanje administrativnih, finansijskih, marketinških i drugih aktivnosti u cilju pribavljanja finansijskih i materijalnih sredstava potrebnih za rad Saveza;
28. Regulisanje svih ostalih pitanja od značaja za razvoj, unapređenje i afirmaciju šaha na području KS, a i šire.

Zastupanje i predstavljanje udruženja

Član 7.

Savez zastupa i predstavlja predsjednik Upravnog odbora i potpredsjednik Upravnog odbora.

Lica za zastupanje i predstavljanje Saveza imenuje Skupština Saveza na mandatni period od četiri godine sa pravom reizbora.

Organi udruženja, njihove ovlasti, način imenovanja i opoziva, trajanje mandata, kvorum i pravila glasanja, uključujući i pitanja o kojima se odlučuje kvalificiranom većinom, funkciju lica ovlaštenog da saziva skupštinu

Član 8.

Organi Saveza su: Skupština i Upravni odbor

Član 9.

Skupština Saveza

Skupština Saveza je organ upravljanja Savezom.

Ovlasti Skupštine su: donosi i usvaja Statut, izmjene i dopune Statuta, Poslovnik o radu Skupštine i druge akte Saveza, daje tumačenje akata Saveza, utvrđuje osnovne smjernice i principe za rad saveza i razvoj šaha, bira i opoziva predsjednika Skupštine, bira i opoziva članove Upravnog odbora, bira i opoziva predsjednika Upravnog odbora, bira i opoziva ovlaštena lica za zastupanje i predstavljanje Saveza, bira predstavnike saveza u organe šahovskih saveza FBiH i BiH, odlučuje o stupanju u članstvo i prestanku svojstva udruženog člana Saveza, usvaja izvještaje o radu i finansijskom poslovanju Saveza kje je pripremio pravni odbor, odlučuje o dodjeli pohvala, priznanja i nagrada pojedincima i organizacijama, određuje način saradnje sa drugim sportskim asocijacijama u skladu sa Zakonom, odlučuje o statusnim promjenama Saveza, odlučuje i o drugim pitanjima u skladu sa zaknom i ovim statutom.

Član 10.

Redovna skupština se održava najmanje jednom godišnje. Redovnu skupštinu saziva i njom predsjedava predsjednik Skupštine.

Vanredna Skupština se održava prema potrebi, na obrazložen zahtjev Upravnog odbora ili jedne trećine članova Skupštine. Vanrednu Skupštinu saziva predsjednik Skupštine.

Redovna i vanredna skupština se mogu sazivati pismenim putem preporučenom poštom, putem službenog maila Saveza ili putem drugih vidova elektronske i mobilne komunikacije (SMS, Viber, WhatsApp, Signal itd.)

Ukoliko predsjednik Skupštine ne sazove Skupštinu u vrijeme i način predviđen Statutom i Poslovnikom o radu, Skupštinu mogu sazvati Upravni odbor ili jedna trećina članova Skupštine.

Član 11.

Skupština može raditi i odlučivati ukoliko je prisutno više od polovine ukupnog broja članova.

Svaki od klubova ima 2 (dva) glasa.

Odluke se donose natpolovičnom većinom glasova Saveza.

Ukoliko na Skupštinu ne pristupi potreban broj članova, Skupština se odgađa za pola sata, a ukoliko ni tada ne pristupi dovoljan broj članova Skupština kvorum za rad i odlučivanje Skupštine čini jedna trećina ukupnog broja članova Saveza.

Predstavnici šahovskih udruženja – članova Skupštine su obavezni na sjednicu Skupštine donijeti ovlaštenja udruženja (klubova) koja predstavljaju. Svaki član ima 2 (dva) glasa.

U slučaju da član Saveza nije izmirio obaveze po dospijeću prema Savezu (članarina, pravdanje i druge slične obaveze) nema pravo učestvovanja u glasanju na Skupštini.

Jedan predstavnik može istupati kao punomoćnik više klubova, za šta je potrebno donijeti punomoć ovjerenu od strane kluba koji tu punomoć daje.

O radu Skupštine se vodi zapisnik kojeg potpisuju predsjednik i zapisničar.

Član 12.

Skupština ima predsjednika koji se bira iz reda članova Skupštine.

Mandat predsjednika Skupštine traje 4 (četiri) godine.

Predsjednik Skupštine ima sljedeće ovlasti: predstavlja Skupštinu, saziva i predsjedava sjednicama Skupštine, potpisuje akte koje donosi Skupština, stara se o provođenju odredbi Poslovnika o radu Skupštine, vrši sve druge poslove po ovlaštenju Skupštine.

Član 13.

Upravni odbor Saveza

- Upravni odbor Saveza ima 5 (pet) članova.
- Predsjednik i potpredsjednik Upravnog odbora se bira iz reda članova Upravnog odbora.
- Predsjednik Upravnog odbora je ujedno i predsjednik Saveza.
- Članove Upravnog odbora bira Skupština Saveza na period od 4 (četiri) godine.

Član 14.

Sjednice Upravnog odbora se zakazuju po potrebi i mogu biti sazvane na isti način kao i Skupština.

Da bi Upravni odbor mogao raditi i odlučivati potrebno je prisustvo natpolovičnog broja članova.

Upravni odbor odluke donosi većinom glasova.

Član 15.

Nadležnosti i obaveze Upravnog odbora su:

- Stara se o dosljednoj primjeni zakona, Statuta i drugih propisa o poslovanju saveza,
- Priprema i predlaže nacrt izmjena Statuta i drugih akata koje donosi Skupština,
- Priprema sjednice Skupštine (ukoliko nije izabran sekretar),
- Provodi politiku, zaključke i druge odluke Skupštine,
- Donosi program rada i finansijski plan,
- Priprema izvještaj o radu i finansijski izvještaj koji usvaja Skupština,
- Odlučuje o davanju finansijskih sredstava u okviru raspoloživih sredstava i sredstava predviđenih finansijskim planom,
- Donosi odluke o prijemu i istupanju iz članstva Saveza,
- Bira i razrješava Sekretara,
- Imenuje i razrješava komisije Saveza
- Vodi brigu o školovanju i stručnom usavršavanju šahista i sportstkih radnika,
- Organizira vođenje evidencije o svim udruženim šahovskim klubovima, organizacijama i registrovanim šahistima,
- Utvrđuje sistem i kalendar takmičenja na području Kantona,
- Organizira šahovska takmičenja (ekipna i pojedinačna) na području Kantona,
- Organizira kurseve, seminare i škole šaha na području Kantona,
- Organizira obavljanje administrativnih, finansijskih, marketinških i drugih aktivnosti u cilju pribavljanja finansijskih i materijalnih sredstava potrebnih za rad Saveza,
- Zastupa interese udruženih šahovskih klubova i organizacija pred organima kantona i sportskim asocijacijama čiji je član,
- Vrš i druge poslove iz nadležnosti Saveza.

Član 16.

Predsjednik Saveza

Predsjednik Saveza koji je po funkciji i predsjednik Upravnog odbora Saveza, ima sljedeća prava i obaveze:

- Predstavlja i zastupa Savez pred organima i trećim licima,
- Organizuje pripremu, saziva i predsjedava sjednicama Upravnog odbora,
- Provodi i prati provođenje odluka Saveza,
- Vrš i druge poslove po ovlaštenju Skupštine i Upravnog odbora

Član 17.

Sekretar Saveza

Savez može imati Sekretara.

Mandat Sekretara traje četiri godine, sa mogućnošću ponovnog imenovanja.

Sekretar za svoj rad odgovara Upravnom odboru Saveza.

Član 18.

Sekretar vrši sljedeće poslove i zadatke:

- Obavlja administrativno-stručne i tehničke poslove za potrebe Saveza,
- Priprema sjednice Upravnog odbora i Skupštine,
- Osigurava provedbu zaključaka i stavova Upravnog odbora i Skupštine,
- Osigurava zakonitost rada i usklađenost aktivnosti organa Saveza,
- Vrš i druge poslove po ovlaštenju Upravnog odbora Saveza.

Član 19.

Komisije saveza

U cilju veće efikasnosti u radu i operativnog izvršavanja zadataka i tekućih poslova, na osnovu procijenjenih potreba, Upravni odbor Saveza može da donosi odluke o formiranju komisija Saveza i imenovanju njihovih članova i to:

Takmičarsku komisiju

Sudijsku komisiju

Disciplinsku komisiju

Komisiju za kadetski i juniorski šah

Član 20.

Komisije prate stanje iz svoje oblasti, daju mišljenja po određenim pitanjima, podnose prijedloge radi donošenja odgovarajućih odluka i obavljaju druge poslove u skladu sa općim aktima i odlukama.

Za svoj rad Komisije odgovaraju Upravnom odboru.

Oblik i sadržaj pečata udruženja

Član 21.

Savez ima svoj pečat, okruglog oblika prečnika 30 milimetara.

Pečat Saveza je okruglog oblika sa unutarnjim sadržajem i to: na obodu pečata je latinicom ispisan velikim slovima tekst „ŠAHOVSKI SAVEZ KANTONA SARAJEVO“, a u sredini pečata je velikim slovima latinicom napisano sjedište – SARAJEVO.

O upotrebi i rukovanju pečatom Saveza odlučuje predsjednik Saveza.

Oblik i sadržaj znaka

Član 22.

Savez ima svoj znak.

Oblik znaka je sljedeći: na horizontalnoj podlozi od pet kvadrata u obliku šahovskih polja koja su naizmjenično tamna (3 tamnosmeđe boje) i svijetla (2 boje slonove kosti) nalaze se šahovske figure i to počevši s lijeve strane: svijetli skakač, tamni kralj, svijetla kraljica i tamni top, a ispod horizontalne podloge se nalazi tekst ispisan latinicom u tamnosmeđem tonu u dva reda: Šahovski savez (1. red) Kantona Sarajevo (2. red).



**Šahovski savez
Kantona Sarajevo**

Sticanje i raspolaganje imovinom

Član 23.

Savez stiče svojstvo pravne osobe upisom u registar udruženja, sa pravima i obavezama koje ima na temelju Ustava, zakona i ovog Statuta. U pravnom prometu s trećom osobom istupa u svoje ime i za svoj račun.

Član 24.

Imovinu udruženja i fondacija čine:

- 1) članarine, kada je u pitanju udruženje;
- 2) dobrovoljni priloz i pokloni fizičkih i pravnih lica;
- 3) sredstva dodijeljena iz budžeta;
- 4) prihodi od kamata, dividendi, dobiti od kapitala, zakupnina, honorara i sličnih izvora pasivnih prihoda;
- 5) prihodi stečeni obavljanjem privredne djelatnosti;
- 6) drugi prihodi stečeni, u skladu sa Zakonom i statutom.

Član 25.

Nadzor nad namjenskim korištenjem i raspolaganjem sredstvima saveza vrši Upravni odbor Saveza. Finansijsko poslovanje se vodi u skladu sa zakonom.

Način donošenja finansijskog izvještaja i izvještaja o radu

Član 26.

Finansijski izvještaj i izvještaj o radu Saveza se usvaja najmanje jednom godišnje natpolovičnom većinom glasova članova Skupštine Saveza.

Navedene izvještaje priprema i Skupštini dostavlja Upravni odbor.

Postupak za donošenje statuta, izmjena i dopuna statuta i drugih općih akata udruženja

Član 27.

Statut u njegove izmjene i dopune donose se kad ih glasanjem usvoji natpolovična većina članova Skupštine.

Odluke Skupštine donose se većinom glasova prisutnih članova.

Odluke i zaključci Skupštine obavezni su za sve članove Saveza.

Uslovi i način učlanjenja, prestanak članstva, kao i prava, dužnosti i odgovornost članova udruženja

Član 28.

Članom Saveza mogu postati sportska udruženja koja u svom statutu imaju za cilj da doprinose razvoju i napretku šaha, da razvijaju takmičarske šahovske aktivnosti, a koja su registrovana kod Ministarstva pravde i uprave Kantona Sarajevo.

Članstvo u Savezu je dobrovoljno.

Članovi Saveza mogu postati svi šahovski klubovi sa područja Kantona Sarajevo, pod uslovom da dobrovoljno prihvate Statut Saveza i obaveze koje iz njega proizilaze.

Odluku o članstvu u Savezu verifikuje Skupština Saveza na prijedlog Upravnog odbora Saveza.

Molba za članstvo treba da sadrži izjavu u kojoj klub ili stručna organizacija jamči da će se pridržavati zakonskih propisa, Statuta, propisa i odluka Saveza.

Član 29.

Klubovi mogu osnivati ili udruživati se u odgovarajuće saveze i sportska društva na području Kantona.

Sportski savezi Kantona u određenom sportu mogu se udruživati u sportske saveze određenog sporta na nivou Federacije Bosne i Hercegovine, odnosno u sportske saveze određenog sporta na nivou Bosne i Hercegovine.

Za jedan sport na nivou Kantona Sarajevo može se osnovati samo jedan sportski savez.

Član 30.

Prijem u članstvo

Skupština Saveza, na osnovu odluke o prijemu Upravnog odbora Saveza verifikuje članstvo i vrši suspenziju ili isključuje iz članstva bilo kojeg člana Saveza, u skladu sa odredbama ovog Statuta.

Svako pravno lice koje želi postati član Saveza mora se pismeno obratiti Upravnom odboru Saveza.

Zahtjev sadrži :

- primjerak zakonski važećeg Statuta i propisa, osnivački dokument i dokaz o registraciji kod nadležnog organa,
- izjavu da se podnosilac prijave, kao i svi njegovi članovi, klubovi, službena lica, igrači, treneri, kao i sva druga lica obavezuju da će uvijek poštivati Statut i druge propise Saveza.

Skupština usvaja posebne propise koji regulišu proceduru prijema u članstvo.

Nakon što je klub, odnosno udruženje primljen u članstvo, daje se pravo da odmah pristupi bilo kojem takmičenju organizovanom od strane Saveza, ako to takmičenje nije već počelo, odnosno ako krajnji rok pristupa nije istekao.

Članstvo u Savezu prestaje:

- Odlukom Skupštine Saveza
- Na lični zahtjev, pisanim putem;
- Isključenjem u slučaju djelovanja u suprotnosti sa ciljevima i djelatnostima Statuta i Udruženja.
- Prestankom svojstva pravnog lica

Član može biti isključen iz Saveza u slučaju da:

- ne ispuni svoje finansijske obaveze prema Savezu,
- teško prekrši Statut, Pravilnike i odluke Saveza,

- ugrožava interese i jedinstvo Saveza,
- izgubi svojstva na temelju kojih je dobio članski status.

Odluku o prestanku članstva donosi Skupština prema odredbama ovog Statuta.

Član 31.

Klubovi, članovi Saveza, za provođenje stručnih poslova moraju imati stručni kadar u sportu, koji mora ispunjavati slijedeće uslove:

- a) imati visoku ili višu stručnu školsku spremu iz oblasti sporta i fizičkog vaspitanja,
- b) ili imati visoku ili višu stručnu školsku spremu iz drugih oblasti i licencu za rad u oblasti sporta,
- c) ili imati status vrhunskog sportiste sa diplomom za rad u oblasti sporta.

Stručni poslovi u sportu:

- planiranje i realizovanje sportskih aktivnosti djece i omladine,
- planiranje i realizovanje sportske obuke,
- planiranje i treniranje sportista,
- obučavanje građana u sportskim znanjima i vještinama,
- planiranje i realizovanje sportske rekreacije građana,
- dijagnosticiranje i provjera psihofizičkih i motoričkih sposobnosti učesnika,
- planiranje i izvođenje korektivne gimnastike,
- sprovođenje pravila u sportu,
- informatika u sportu,
- menadžment i marketing u sportu,
- naučnoistraživačke djelatnosti.

Član 32.

Članovi Saveza imaju prava i obaveze da:

- Da biraju organe Saveza i da u njih budu birani;
- Da daju prijedloge, mišljenja i sugestije;
- Da prate rad Saveza i pokreću inicijative za rješavanje pitanja od interesa za Savez;
- Da u zaštiti svojih prava koriste pomoć Saveza,
- Da učestvuju na Skupštini Saveza, da unaprijed dobiju njen dnevni red, da budu pozvani u propisanom vremenu, te da ostvaruju svoje pravo glasa;
- Da daju prijedloge za uključenje u dnevni red Skupštine;
- Da nominuju kandidate za izbor u sva tijela Saveza;
- Da podnose zahtjev za sazivanje vanredne Skupštine;
- Poštuju odluke organa Saveza;
- Da budu obavješteni o poslovima Saveza, kroz njena zvanična tijela;
- Da učestvuju u takmičenjima Saveza (ako je to primjenjivo);
- Da ostvaruju sva druga prava koja proizilaze iz Statuta Saveza;
- Udružuju sredstva za provođenje zajedničkih programa;
- Vršu uplate članarina, kotizacija i dr. naknada za finansiranje Saveza;
- Da poštuju principe neutralnosti i nediskriminacije u političkim i vjerskim pitanjima, u skladu osnovnim principima djelovanja Saveza;
- Da se pridržavaju principa lojalnosti, integriteta, sportskog duha u skladu sa duhom fer pleja;
- Da održe svoju Skupštinu barem jednom godišnje;
- Članovi se obavezuju da će usko sarađivati sa Savezom u cilju razvoja i unapređenja šaha na svim nivoima, kao i na organizaciji takmičenja na nivou kantona Sarajevo;
- Članovi se obavezuju da će izbjeći formiranje raznih interesnih grupa koje prejudiciraju ili bi mogle prejudicirati jedinstvo šaha u Kantonu Sarajevo;
- Da se pridržavaju važećih pravila igre.

Član 33.

Klubovi članovi Saveza imaju obaveze vezane za prava sportista, a sportisti obaveze prema Klubovima, a sve u skladu sa Zakonom o sportu BiH i Zakonom o sportu KS, a naročito:

- Sportista je osoba koja se priprema i učestvuje u organizovanim sportskim takmičenjima i ima sva građanska prava utvrđena Ustavom i zakonima Bosne i Hercegovine, entitetskim ustavima i zakonima i podzakonskim aktima.
- Sportisti mogu provoditi sportske aktivnosti samostalno ili u okviru sportskih organizacija. Aktivnost sportista regulišu se ugovorom o radu.
- Sportista je obavezan da se pridržava opštih i posebnih pravila koja su propisana Zakonom, drugim zakonima, podzakonskim propisima i pravilima međunarodnih sportskih asocijacija i strukovnih sportskih organizacija koji vrijede za šah kao sport, kao i da se pridržava posebnih pravila propisanih članom 27. Zakona o sportu KS. Sportista ima sva prava propisana zakonima o sportu.

Član 34.

Klubovi su obavezni izvršavati i provoditi zdravstvenu zaštitu i zdravstveni nadzor u skladu sa odredbama Zakona o sporta i Pravilnika o zdravstvenom nadzoru sportista na području Kantona Sarajevo.

Član 35.

Članovi Šahovskog saveza Kantona Sarajevo učestvuju na sljedećim takmičenjima: Premijer liga BiH, Prva liga FBiH, Pojedinačno prvenstvo BiH, Druga liga FBiH, kao i u drugim vrstama takmičenje za koje budu ispunjene pretpostavke za učešće.

Uslovi i postupak za pripajanje, razdvajanje, transformaciju ili prestanak rada udruženja

Član 36.

Savez se može pripojiti, razdvojiti ili na drugi način transformirati, kada to odluči Skupština Saveza 2/3 većinom delegata Skupštine.

Savez prestaje sa radom:

- Odlukom Skupštine Saveza
- U drugim slučajevima predviđenim Zakonom.

Pravila za raspodjelu preostale imovine u slučaju prestanka rada udruženja

Član 37.

U slučaju prestanka rada Saveza, sva njegova imovina (pokretna i nepokretna), finansijska sredstva i imovinska prava raspoređuju se organizaciji koja naslijedi njegov rad.

Ako takva organizacija ne bude osnovana, sva imovinska prava i obaveze prelaze na osnivača Saveza, nakon podmirivanja svih zakonskih obaveza Saveza.

Ostale odredbe

Član 38.

Rad Saveza je javan. Javnost se ostvaruje održavanjem otvorenih sjednica i skupova koje organiziraju organi Saveza redovnim izvještajima o radu Saveza, neposrednim informisanjem putem sredstava informisanja, kao i na druge odgovarajuće načine.

Svim članovima omogućiti će se neometan uvid u obavljanje aktivnosti na svim područjima na kojima djeluje Savez, kao i planiranje daljih aktivnosti.

Član 39.

Savez ima svojstvo pravne osobe koje stiče danom upisa u registar udruženja, a u skladu sa relevantnim zakonskim odredbama i ovim Statutom.

Savez ima svoj žiro račun kod poslovne banke.

Savez za preuzete obaveze odgovara vlastitom imovinom i sredstvima.

Službeni jezici Saveza su službeni jezici koji se koriste u BiH bosanski, srpski, hrvatski), uz upotrebu latinice i ćirilice.

Član 40.

Sva ostala opšta akta Saveza uskladiće se sa odredbama ovog Statuta u roku od 60 dana od dana stupanja na snagu.

Za sve što nije detaljno uređeno ovim Statutom, na odgovarajući način će se primjenjivati odredbe Zakona o udruženjima i fondacijama (Službene novine Federacije BiH br. 45/02), odredbe Zakona o sportu (Službeni glasnik BiH broj: 27/08, 102/09 i 66/16), i Zakona o sportu (Službene novine Kantona Sarajevo broj: 45/12 – prečišćeni tekst i broj: 36/21).

Član 41.

Ovaj Statut stupa na snagu danom usvajanja na Skupštini, a primjenjuje se od dana upisa promjena u Registar udruženja koji se vodi kod Ministarstva pravde i uprave Kantona Sarajevo.

Danom stupanja na snagu ovog Statuta prestaje da važi Statut Šahovskog saveza Kantona Sarajevo br: 03-05-05-18858/14 od 11.12.2014. godine.

Obavezuju se članovi Saveza da svoje statute usklade sa ovim Statutom.



Predsjednik Skupštine

Šahovskog saveza Kantona Sarajevo